

Puntonan di accion di RED Eleccion 2013

E partido politico RED DEMOCRATICO a keda funda dia 30 di mei 2003. RED den gobernacion tin 5 punto di accion cu ta pone e hende central:

1. Respet pa derecho di mucha y di hobennan

RED den gobernacion lo institui un Bureau pa Asuntonan di Mucha, cu ta desaroya y ehecuta un plan integral di derechonan di mucha. Na mesun momento e bureau aki lo desaroya un plan integral di maneho pa nos hubentud cu e meta pa atende problemanan di conducta bou di hobennan y pa combati delincuencia hubenil. E perspectiva di e maneho aki no mester ta represion sino prevencion. E Bureau aki ta decision di e autoridad maximo cu ta Consejo di Minister cu lo conta cu fondonan special den Presupuesto di Pais Aruba.

Di otro banda mester tin un instancia independiente pa vigila e respet pa derechonan di mucha. Lo institui un Ombudsman cu ta un instancia independiente nacional di derechonan humano cu ta atende kehonan di tur ciudadano, pero muy en especial di muchanan, ya cu muchanan ta e parti mas vulnerabel den nos sociedad y nan no tin voz ni derecho di voto pa influencia gobernacion.

RED den gobernacion lo ta un gobierno cu ta garantiza cu un di e metanan principal di scolnan ta pa duna les den derechonan humano y derechonan di mucha. E tema aki di derechonan humano lo forma parti esencial di e curriculum di Universidad di Aruba y di Instituto Pedagogico di Aruba, cu ta train nos profesionalnan cu lo traha cu mucha.

Ta duna Papiamento su lugar mereci den enseñansa, como cu Papiamento ta e idioma materno di mayoria di nos muchanan, e idioma mas accesibel, mas uza den nos comunidad y idioma oficial di Pais Aruba. Un Arubiano mester domina su idioma tanto oralmente, como skirbi. Esey kiermen cu den klas 1 di scol basico e mucha ta siña lesa y skirbi den Papiamento y den henter scol basico e ta sigui desaroya su habilidadnan di idioma y su conocimiento na Papiamento. Banda di Papiamento nos muchanan lo siña tambe otro idioma, segun e concepto di Scol Multilingual. E mucha Arubiano lo bin den contacto cu e idioma stranhero Ingles, Spaño y Hulandes for di scol preparatorio. E ta siña Ingles, Spaño y Hulandes como idioma stranhero den scol basico. Den klas 5 y 6 ta pasa gradualmente pa Hulandes como idioma di instruccion, como cu den enseñansa secundario Hulandes ta idioma di instruccion.

Un problema serio ta muchanan bandona ('verwaarloosde kinderen') dor cu mama y tata tin cu traha. Pesei lo introduci e sistema di 'Club Escolar': alumno di tur scol ta keda scol durante 40 ora pa siman. Den ora di atardi ta traha huiswerk y ta participa na actividad deportivo y cultural bou di guia profesional. Na nivel deportivo lo stimula pa scolnan competi cu otro.

RED den gobernacion lo destina 10% di nos Entrada Bruto Nacional den nos sistema educativo pa coregi e retraso di inversion den estructura di enseñanza y pa mehora e calidad di e maestro. E meta final ta pa yega na entre 30% y 50% di bo poblacion laboral riba un nivel minimo di enseñanza superior.

Meta di educacion ta tambe pa siña convivi cu otro y parti di e diversidad aki ta esnan cu tin algo special of un necesidad special. No por tin scol apart pa esnan cu tin necesidad special. For di chikito tur mucha mester siña biba cu diversidad, cu tur tin derecho pa t'ey y pa ta feliz.

2. Respet pa derecho di hende grandi y di esnan cu necesidad special

RED den gobernacion lo institui un bureau di asuntonan di hende grandi cu ta coordina e red di organisacionnan cu ta cuida bienestar di nos grandinan, especialmente e grandinan mas vulnerabel. E ‚vergrijzing‘ di nos poblacion ta avanza rapidamente y e meta di e bureau ta pa desaroya y ehecuta un plan integral pa hende grandi. Lo atende profesionalmente por ehempel e maleza di Alzheimer y lo bin cu un plan di concientisacion pa esnan cu ta cuida nos grandinan. Lo desaroya instrumentonan legal di derechonan di hende grandi cu ta prohibi discriminacion a base di edad y ta reconoce hende grandi como suheto autonomo.

RED den gobernacion lo haci henter Aruba, cuminzando cu tur edificio di gobierno, accesibel pa esnan cu necesidad special. Otro medida cu RED den gobernacion lo tuma pa respeta nan derecho ta mas posibilidad y apoyo pa nan por huur instrumento of aparatonan, manera rolstoel; cambia nos ley di trafico pa haci posibel e uso di autonan special, manera e uso di autonan di 20 km. pa ora sin tin rijbewijs; extende carta di dokter na nan cu ta duna nan e derecho di por parkeer riba trottoir of lugarnan special; hasi playa comercial full accesibel pa nan, pensando tambe riba nos turistanan crucero; invita FCCA pa traha casnan pa nan den projectonan nobo; pone fondonan disponibel pa por adapta casnan pa asina nan por keda biba na cas en vez di bai den un institucion; tur trottoir mester conoce facilidad pa rolstoel of ‚scootmobil‘; motiva dunadornan di trabou pa tuma nan den servicio.

3. Respet pa derecho di naturaleza

Introduccion a corto plazo di e ley di medio ambiente (Landsverordening Milieubeheer) pa garantiza un medio ambiente sostenibel. Ta proteha contra contaminacion di awa, tera y aire. Ta prohibi legalmente destruccion di naturaleza y di paisahe natural.

Ta pone ‚recycle-containers‘ den bario y na scolnan y ta educa e pueblo pa ta mas conciente cu sushi. Un maneho di sushi basa riba ‚reduce, re-use, recycle‘. Lo prohibi uso di saco di plastic pa

cuminza reduci loke ta susha nos naturaleza. Planificacion adecuado di infraestructura pa evita molester di stof, sonido, mal holo, y radiacion. Maneho di construccion di cas ta basa riba e principio di sostenibilidad. Esnan cu ta ricibi permiso di construccion mester planta un area berde den nan diseño. Lo mas posibel lo pone caminda pa bicicleta compañía pa area berde na e camindanan.

Lo stimula 'small boutique hotels' den area di Seroe Colorado garantizando cu Baby Beach y Rodgers Beach ta keda publico. RED ta contra construccion di hotel grandi, pero hotel chikito luhoso ta pas cu e area di Colony y ta pas cu nos meta di promo-ve turismo medico.

Lo promove remedi di tera. Cu RED den gobierno cannabis ta keda legalisa na Aruba como remedi. Uso personal di cannabis, cu ta un remedi, lo bira legal na Aruba cu RED den gobierno. Na mesun momento lo bin cu un campaña intensivo di informacion y educacion tocante e peligernan di droga, alcohol y sigaria y pesei lo prohibi legamente tur humamento den lugarnan publico. E tendencia internacional ta pa decriminalisa y hasta pa legalisa cannabis. Lo promove turismo medico pa patientnan ricibi na Aruba tratamiento cu cannabis.

4. Respet pa derecho di minoria

Na e momento aki tin un minoria cu a cai den spiral di miseria. Lo apoya e grupo aki entre otro cu medionan di agricultura, permacultura y piscamento pa lanta cabez bek. Lo bin cu cooperativa-supermercado cu ta ofrese prijsnan barata y baha e costo di bida. Lo apoya pa e clase media bira mas fuerte dor di duna tur sorto di facilidad na empresanan chikito y contraresta e tendencia actual cu e clase media ta birando un minoria.

Nos Constitucion ta hopi cla, tur hende ta igual y no por keda discrimina a base di color, raza, religion, nacionalidad, edad, handicap, sexo y identidad sexual. Lo no tolera discriminacion den ningun sentido. Lo bin cu un plan nacional contra discriminacion y un 'meldpunt' na Departamento di Labor unda por denuncia cualke forma di discriminacion riba tereno laboral.

Aruba lo reconoce e derecho di homosexualnan riba matrimonio, e mesun derecho cu heterosexualnan tin. Aruba ta reconoce tambe 'geregistreerde partnerschappen' entre parehanan di mesun sexo. Cualke forma di discriminacion of violencia contra parehanan homosexual lo no keda tolera. Pesei lo bin un 'meldpunt' na Cuerpo policial unda por haci denuncia anonimo di discriminacion di parehanan homosexual. Lo traha legalmente pa no tin discriminacion entre parehanan tambe pa loke ta e crianza di yiunan y lo usa medio educativo pa aumenta e aceptacion social.

5. Respet pa derecho di pueblo riba bon gobernacion

Tur esaki ta posibel dor di elimina gastonan innecesario di gobierno pa financia e puntonan di accion aki. Lo elimina e fenomeno di coordinador/consultant, lo implementa e 'kerntakenanalyse' unda ta stipula cua ta e tarea specifico di gobierno y ta stipula pa ley e maximo na funcionario publico pa cada departamento, pa cada nombracion politico e minister concerni ta keda poni personalmente responsabel y ta keda persegui legalmente, lo instala un comision nacional pa personal di gobierno cu lo ta un instancia independiente di politica. Lo bin control estricto riba cumplimiento di ley di destaho public. Ta elimina corrupcion dor cu integridad ta un exigencia legal tanto pa ministernan y parlamentarionan. Dor di e maneho aki lo spar hopi placa cu lo keda inverti den nos puntonan di accion.

6. Vakminister

Partido Red Democratico a ser lanta pa bin cu cambionan fundamental pa Aruba haña bon gobernacion y integridad den gobernacion. Den un democracia parlamentario, ta esun cu pueblo a duna e confiansa directamente pa medio di su voto, mester tuma asiento den parlamento. Pueblo ta vota pa su parlamentarionan y no pa ministernan. E statutnan di Red Democratico ta muestra cu un candidato riba lista di Red Democratico no por bira minister. E perfil di un Minister pa partido Red Democratico por ser califica como 'vakminister', un persona profesional y experto cu no ta politico.